

四庫全書

集部

欽定四庫全書

集部

古城集

御製詩

卷二

詳校官中書臣賈鏐

中書臣劉源溥覆勘

總校官進士臣朱鈐

校對官主事臣陳墉

謄錄監生臣濮鎔

御題張吉古城集

出處惟持正氣純三朝奏議識其人
弩車未免泥去聲於

古明張吉江西餘干人著古城集第一卷曰三朝奏議第二卷曰陸學訂疑第三卷曰貞觀小斷第四五六

卷為詩文吉持身剛正為文章恪守先民矩矱偶閱其

三朝奏議卷內上時務疏一篇云三王五霸以車戰制

勝後世惟漢武知此意其遣衛青霍去病深入朔漠實

用武剛車請懸金購募諳曉車戰之人以車制馬以馬

制步云云又謂制遠莫如銳弩二械所言未免泥於古法殊不切事情也鉄鉞不辭試以身

學闢姚江守篤實文殊獻吉尚華新貞觀小斷我心獲

貞觀小斷評論唐太宗規模廣大而亦間有不滿於得

失逐加評斷如懷鷄事一節引旅葵明王慎德不矜細

古城集

行終累大德之語謂魏徵爾時當以經意婉辭微諷之上必自悟云云余向嘗書唐太宗懷鵠事後云徵以此事為不宜何不犯顏直諫而故為此諂術以徵平日敢言律之必不出此又如縱囚一事余昔嘗以太宗好名之事不一而莫甚於縱囚又欲觀實錄事余嘗以人君言行天下記之苟其謹言慎行雖不觀實錄可若恣意妄為雖百觀無益今張吉小斷論列亦以縱囚為非於觀實錄以人君兢兢致慎者在不見不聞之地所言頗中體要實於疵小原無害大醇

余心有獲也

疵小原無害大醇

欽定四庫全書

集部六

古城集

別集類五

明

提要

臣等謹案古城集六卷補遺一卷明張吉撰

吉字克修號翼齋又曰默庵又曰怡窩晚乃
稱曰古城餘千人成化辛丑進士官至貴州

左布政使是編第一卷為三朝奏議第二卷
為陸學訂疑第三卷為貞觀小斷第四卷為

文畧第五第六卷為詩末有補遺皆雜文明
至正德初年姚江之說興而學問一變北地
信陽之說興而文章亦一變吉當其時猶兢
兢守先民矩矱高明不及王守仁而篤實則
勝之才膽學富不及李夢陽何景明而平正
通達則勝之且為工部主事時則盡言極諫
忤武宗謫官為廣西布政使時又以不肯納
賂劉瑾貶秩而為肇慶府同知時力持公議

培擊柳璟願與都御史秦紘同逮卒白其冤
尤人情所難以剛正之氣發為文章固不與
雕章繪句同日而論矣乾隆四十六年六月
恭校上

總纂官臣紀昀臣陸錫熊臣孫士毅

總校官臣陸費墀

--	--	--	--	--	--	--	--	--

欽定四庫全書

古城集卷一

明 張吉 撰

星變求言疏

工部營繕清吏司主事臣張吉謹奏為修德弭災以回
天意等事臣伏覩勅諭云云臣愚有以知陛下是心實
悔過遷善之機宗社生靈之福聖子神孫萬世無疆之
休臣聞救烈焚者不以杯水拯深溺者不以尺繩弭大

患者不以小故塞鉅責者不以細談則臣之奉詔敢不
悉心苦口力陳極諫以盡其愚而陛下聽臣所言亦宜
虛心採納不以忤已難行而斥之可也陛下即位以來
二十一年於茲以聰明睿智之資備孝友慈仁之德存
好生惡殺之心然而生民不被其澤四方不得其寧庸
可不知所自歟良由近年以來儒臣疏隔政事廢弛每
日退朝以後不過與左右近習之人羣居狎處康好逸
遊以歌舞為娛樂以珍寶為玩適以佛老為感孚以祈

禱為修省以工役為庸作以聚斂為能事以妖書為至
言以邪術為正道剝民效獻者名曰順孝迎合意旨者
號為忠款使諍臣杜口莫敢誰何而祖宗設立臺諫之
意漫不加省凡上章奏者苟有片言隻字干涉時事則
必罪其泛言攪擾否則曰事已處置胡為再言甚至嚴
加譴謫恨不置之死地而後已於是遠近相戒以言為
諱陛下孤立於上危如累卵而左右奸佞之徒兇威日
熾略無畏忌鬻用儉邪排擯正直招權植黨虎噬疲氓

又乘陛下歡樂之餘造膝頓首甘言軟語以祈其欲陛下偶未之察少從其請而天下之大事去矣如從其乞恩之請則倖進多而名器壞從其採辦之請則漁獵廣而民力殫似此之類不可枚舉其害可勝言乎又引妖僧繼曉贓罪吏典李孜省及一切亡命無賴之人扇為邪法蠱惑聖心出入禁闥備極榮寵雖三尺童子皆知唾罵而陛下獨未之覺職此之故以致災異疊見曠世罕聞山西陝西河南等處連年荒旱居民十死七八橫

屍布野積骨成丘過者為之掩鼻聞者為之寒心此其
可憂之極不待知者而後知也今上天垂象警告深切
而陛下惕然憂懼降詔求言此真知天意所在而力求
所以挽回之道然臣聞之為治顧力行何如苟踐履之
功推行之實一有未至則雖有悔悟之心哀痛之詔亦
託諸空言而已果何以允協天心而返其譴告之意乎
伏乞自今以始盡絕前日所好盡棄前日所為每退朝
尚膳之後日就便殿宣召二三大臣將中外羣臣所上

章奏次第檢閱考論是非以求至當歸一之論然後施行苟有未善許令給事中等官指陳得失直言無隱以俟更改不得仍前緘默以致釀成莫測之禍逮聖躬休暇之餘退居宮禁宜閱尚書春秋及宋儒朱熹所修資治通鑑綱目真德秀所撰大學衍義等書以鑑前代治亂興衰之迹及其稍倦則澄心靜慮涵養本原以為應事接物之基使邪枉之念一毫不萌於內諛諛之言一語不經於耳淫巧之器一物不陳於前而陛下此心常如

太空之無雲止水之無波以此照物何幽不燭以此應
事何往非宜而政事之得失臣下之忠邪軍民之利病
豈有不得其要而操縱予奪之權可以參之於衆而斷
之於獨乎若其他蠹國害民之政則大臣科道必將備
舉無遺無俟乎愚論之諄復然臣猶恐陛下狃於故常
牽於浮議未能一一聽信舍其舊而圖其新也則當時
所宜克已痛革至要而至切者又不可不姑舉一二以
例其餘竊惟近年以來以傳奉得官者冗濫無算宜削

其祿秩以舒供億之浩繁以賄賂求進者希望無厭宜
嚴加禁約以塞奔競之門戶輟蓋寺之費以實帑寬
九門之稅以裕小民清鹽課以益邊儲謹刑獄以雪冤
氣邊境之虞不可不議其備饑饉之地不可不拯其生
貢獻之物不可不卻其來誅求之使不可不絕其去賞
賚之需不可不知其節服御之飾不可不抑其奢行伍
之士不可不寬其力暴橫之黨不可不戢其威強珍董
旻成實于大節徐鏞何光輩凡以言事去職者不可不

復其官張善吉李孜省繼曉之徒不可不正其罪夫繼
曉孜省無足言者善吉本以明經出身備員諫位及其
失職遭貶於分固宜為善吉者正當自思薄劣無補聖
明奉身求退可也顧乃哀訴乞憐謬仍故職為人若此
尚可望其拾遺補闕而有以格君心之非乎臣以善吉
不去終無以勵庶恥之士而來忠諫之言乞正其罪狀
放歸田里以抑貪冒無恥之風若夫林俊張黻既知其
寃正宜特加顯擢以旌其直不當置之南京以示陛下

本無求言納諫之實不過姑為是舉以應天變而已臣
所謂克已痛革至要至切若此數事是已然陛下誠能
清心寡欲親近儒臣講求治道孜孜不倦則天下幽眇
之義隱伏之情尚可觸類而長紬繹敷設以為民休況
臣所言昭彰於人耳目而有不可舉行者乎若此而天
意不回災異不息邊境不寧民困不蘓乞加臣重譴以
懲欺罔臣伏覲勅諭恐大臣科道會本類陳未免詳於
庶政而略於君德則陛下前日舉動之失何由得聞今

日悔悟之機何由得遂臣聞古人有言曰臣寧言而死
於鈇鉞不忍緘默以負吾君是敢忘其愚陋披瀝肝膽
昧死為陛下言之伏乞思祖宗創業之艱難念繼體守
成之不易少延睿覽採而用之則臣雖萬死亦無所悔
臣不勝戰慄悚懼之至具本親賫謹具奏聞

甄別善惡疏

廣東肇慶府同知臣張吉謹奏為甄別善惡以協公論
等事臣伏蒙聖恩待罪肇慶二年於茲每觀中外臣民

有所建白苟可以惠益元元必蒙聖情曲賜俞允臣未嘗不咨嗟歎息以為聖主在上太平可延頸而待則事有關於民情人或不以為言而朝廷莫之聞者臣安敢不為皇上陳之臣伏見近差錦衣衛百戶范瑄執總督兩廣軍務都御史秦紘以歸將理柳景之獄臣雖至愚亦知陛下此舉欽恤典型不忍果於誅景而欲求生於紘此即帝舜好生之德文王慎罰之心所以仁景者可謂至矣而所以處紘則臣愚所未解也何則柳景穢德

波及無涯絃一旦劾而去之兩廣軍民如脫水火今忽被執以歸聞者莫不相顧駭愕或淒然泣下者有之豈聖心偶未之思乎臣竊計祖宗設立都御史等官固以糾劾百僚肅清庶政為職絃之劾景亦不過舉其職而已以是見執臣恐中外解體而小人恣為奸惡無復忌憚殆非朝廷之福此臣之所以未解也臣謹按給事中等官屈伸等所勘絃景交奏事情絃之罪莫大於誣奏柳景掠殺指揮莊鑑一事然此事實臣所按使絃坐是

落職是陛下因臣所按失一碩臣也兩廣生靈因臣所
按失其所恃以為安也天下後世因臣所按得以疵議
聖政之得失也臣偃然天地間一罪人耳復何顏立於
其位而竊祿以自榮乎臣伏讀大明律一款若告二事
以上數事罪等但一事告實者免罪今絃奏景掠殺莊鑑
崔綱潘瑜三人而虛止莊鑑一人此法若行絃不宜坐陛
下必欲法外黜絃乞視所黜爵級坐削臣秩以贖絃罪
可也夫絃在兩廣亦不過以衆人遇臣臣何德絃之有

第以絃旣坐誣抵罪議者必歸獄於臣將無以自白於天下抑絃景曲直昭然可見設並得罪刑賞頗矣何以勸懲將來此臣所以惓惓不能已也使臣始按其事巧為揜覆不証絃誣是不忠也旣証其誣使絃坐黜不思所以贖之是不義也不忠之罪易見不義之罪難知皆非臣之所忍為也陛下續承祖宗丕緒宜開張聖德進君子退小人培養元氣以垂億萬年無疆之休是雖一時關繫匪輕伏乞聖慈俯念兩廣生靈少延公論還絃

故職以收人心則臣雖坐削復何求焉臣不勝懇切惶懼之至為此具本順差醫生廖興親賫奏聞

陳言地方疏

廣西等處提刑按察司兵備副使臣張吉謹奏為乞恩養病陳言地方事臣本不材誤蒙朝廷作養簡拔厯陞今職自弘治十三年六月到任以來拳拳以猥庸薄劣不稱任使為懼所轄桂林平樂二府大率山獠土獠十居八九而版籍良民不過十之二三以此二三當彼八九

衆寡不侔強弱懸隔宜乎蠻寇出沒無常生民數被其害矣然以二府較之平樂為甚而平樂所屬州縣則在府江之東者猶民夷參錯混同為生其在府江之西者獠獞多而百姓少寄食虎口朝夕懷焉幸而西民據寨設險結髮習戰能自捍禦非若東岸之民散居平地無險可據故東賊欲出必借西賊為勢西賊既出必假東賊為家二者合從多累千百少不下數十或橫行江面則舟楫不通或暴掠村屯則城門晝閉臣視事之初博

詢者艾皆曰二賊之從不散則地方之患未已然欲散其從必先除東賊東賊既除乃斷西賊左臂不待深治而少寧矣再審信然乃令府縣申蒙前該總督軍務劉都御史依允施行臣督同知府謝湖指揮裴綱千戶霍珍王溥及聽調主簿高主通等審擇東賊肆惡尤甚者漸次芟夷或撫或誅或擒或縱或設策致其渠魁或伏兵翦其羽翼或檄良徭據其巢穴或嗾讐怨剗其腹心二三年間賴朝廷洪福東賊殘徒殄殲過半前後通計

四百七十餘功陸續解赴總府軍門閱驗梟掛於是二
賊之從始散生民之業稍寧故先年所謂劇賊之區如
東寨南平唐拱喬料膾魚滑石崩沙洛口大源仙陂葛
家糯洞岐村周塘雷霹松林員藤歸化等處皆頗安帖
無虞其在沿江獨大桐仙回田冲等賊其在鄉村惟魚
筍九洞花山等賊數勦數逃累招累叛踰旬浹月或一
逞克賊旣未除臣罪奚追然使臣事不掣肘少假歲月
或可少安奈都御史劉大夏旣去言不見聽而讒口蜩

興計無所施而奸謀角奮將臣用事之人羅織煅煉幾陷死地臣雖幸脫實亦何顏於是力請給申以行去年九月內行至湖廣醴陵縣偶患傷寒病症變成痢疾因無明醫恐致道殞乃敢便謁桑梓覓醫調治未痊間有舍人周弼齋捧公文召回視事臣思前疾未瘳旣難赴部而進退尚未明白敢謀自安於是力疾回任尚冀改絃易柱事勢猶或可為而臣節食服藥尚可須臾無死不意理體乖違比昔尤甚而臣疾日深一日累至阽危

即日頭風痰飲併攻於上痔毒遺洩交作於下使臣持
祿不去是謂妨賢臣疾失今不治必致無救妨賢則廢
事無救則亡身廢事亡身之人尚可久污憲度以干清
議耶伏乞將臣放歸田里調理前疾倘或殘喘尚存後
當別請極邊一職自效期於以死報國而已臣竊惟經
理地方惟在得人而任人之術去讒為急今日可以代
臣者以臣所知若知府謝湖同知葉元皆其人也如蒙
簡任一人畀之戎務俾得展布四體不為讒口所撓將

來事緒必有可觀臣倘未死尚可觀見成功噓鮮凋弊以酬臣知臣今一卒不得請給一事不得專行騰詞布牘動見猜阻正所謂留之一日則為一日之害一月則為一月之害臣仰惟皇上聖德如天覆地載萬一垂憐不誅臣亦安敢猥隨尸素盜躡豐腴不復思有人間廩恥事耶緣係乞恩養病陳言地方事理未敢擅便為此具本順差司吏廖晏齋捧謹具奏聞

上時務疏

廣西等處提刑按察司兵備副使臣張吉謹奏為陳言
時務事臣以非材忝司戎務幾及六年上賴朝廷威德
盜賊雖未盡息而出沒有時瘡痍雖未盡瘳而歲年粗
稔亦既幸矣獨念衛喇特乘先帝賓天之後侵軼我疆
圉殄殲我官軍虔劉我人民驅掠我財畜含靈之類孰
不痛心疾首而况乘車載弁以趨者尚敢顧恤軀命不
思卧薪嘗膽以伸敵愾之氣哉臣每閱邸報擁襟獨坐
憂慮萬端然思今日有可恃者祖宗列聖豐功偉烈冠

絕千古而先帝又以深仁厚澤培植根本垂二十年享國彌久求治彌篤故天下者年淵德咸萃於朝而陛下即位之始雖邊圉孔棘然朝廷之上君臣輯睦言路開通足以維繫中外人心識者用是卜知強敵之無能為也矧聞言官請詔在廷諸臣各建備邊一策各舉將材一人而陛下特賜俞允施行臣以為此舉之善雖使堯舜復生其施為次第亦莫有先於此者苟推而達諸天下使有智略者各陳所見各舉所知朝廷俞受而敷施之

此即揚雄所謂漢屈羣策羣策屈羣力則雖彊如嬴秦慄慄猾賊如項羽皆逡巡逃避之不暇尚何邊警之足憚哉臣聞業專則精事專則成曩者敵勢方張之日羽檄旁午駟介交馳朝廷責任於兵部大臣大臣委成於職方郎署耳目叅涉朱墨迭揮而且應酬不暇雖有奇謀大勇接踵庭叅奚暇與之周旋委曲以盡其平日之所長哉莫若選任郎曹有幹局精鑒者二人不復責以吏事俾就教場寬閒處所將諸臣所建之策所舉之

人逐一詳延精究較量揣摩苟有一策可行一夫可用則歸而言諸大臣親加質究果可採錄然後奏請施行其有所弛之士謬悠之談無益於事者亦皆慰諭遣之不加恚譴則羣策畢舉而人樂為用臣竊謂便夫我朝建都北方所恃者大同宣府沿邊諸鎮以為屏蔽又藉紫荆倒馬居庸鴈門黃花肚北諸隘以為喉襟前日敵騎深入內地屏蔽幾危而喉襟可慮茲豈天意或者人事有未盡歟如主事王綸赴敵議事席猶未煖而陰抑

默奪之計已肆行矣設有孫吳韜略倏來忽去畏罪救過之不暇亦難責其成功而况後人乎此人事未盡者一也遊擊等官領兵逐敵既無偵騎探報又不虞敵設伏冒險輕動墮敵計中卒使隻輪不返聞者寒心其辱國無狀如此而除名追奪之典不加此人事未盡者二也敵至則令大臣帥師以往敵退則聽大臣請命而歸爭議功級紛紛不決臣恐敵人聞而竊笑之此人事未盡者三也邊關內外將領當先帝升遐之後敵騎充斥

之時忿爭互毆略無顧忌此其狠愎忘哀自為讐敵以
張敵勢不忠孰甚焉未聞置諸憲典以懲不恪此人事
未盡者四也此四者臣之所知竊謂不可其所未知者
蓋又難以指數而大敵在前事多舛謬乃欲克詰戎兵
伸威邊地其可得耶今大同宣府等府等鎮雖各設鎮
巡等官而各保其境土各為其兵民氣勢血脉不相聯
屬痛癢不相關涉倘有擾攘欲其視如已事捲甲疾趨
難矣宜倣先朝故事簡命素有材望大臣如周經許進

林俊者一人畀以總制之權不數易不遙制不為人言
所惑俾得畢力殫慮於諸鎮之間庶事體歸一成功可
望臣竊謂便各關守備將臣承平日久徒以聲色服馬
相高不閑戎務緩急之際不足倚仗衆所咸知倘遇警
急宜選各部主事評事等官往監其軍晝夜操守走探
設伏務盡其方其間將有不職事有不便者許陳請更
置事定歸朝臣竊謂便臣又謂漢晁錯論兵以為制勝
之道有三一曰得地形二曰卒服習三曰器械利臣竊

嘗偃卧轅門深計遠省未嘗不服錯之知兵其言簡而要矣臣足跡未嘗至衛喇特其山川險易皆不能知而布陣團操坐作進退之法擊刺騎射之方諸鎮帥臣亦必頻加督習有可觀者其得地形卒服習二事姑置勿論惟器械一節臣竊以為必先審敵人所長思所以破之又審我之所長思所以用之乃可制勝如金人善用拐子馬橫行遼宋之間二國不能博求所以破之之術坐受其困可謂愚矣直至岳飛楊沂中等或以麻札刀入

陣第斫馬足戒勿仰視或以萬人持長斧如牆而進上
堪人胸下斫馬足而敵技始窮使二國亟求其人早行
其計則遼固未便覆亡而宋亦豈為南渡偏安之小國
哉臣始至府江之時特苦夷賊藥弩中者輒死無救而
諸軍見賊輒奔幾不可制臣乃厚募解藥多置挨牌而
前患頗熄人無畏心然後教以勁弓神銃射疏及遠賊
不能當斯罕出矣今衛喇特所長者弓馬雖與南蠻不
同然求其所以破之之術豈無說耶如遠斥堠以謹敵

息望埃氛以驗馬行毒泉源而飲者必死布渠答而蹈者即顛此雖兵家常法然奉行不至徒事虛文無益也臣聞三王五霸制勝之方惟用車戰後世惟漢武帝能知此意其遣衛青霍去病深入朔漠捕斬首虜動以萬計實用武剛車行則為陣止則為營以取勝耳厥後車法既壞邊患益深復古之議曠焉無聞臣竊病之今之議者不能博謀有識深考古制乃謂車法宜於古而不宜於今則亦何異於彼而又不知欲假何術以制敵騎

耶臣舊見都察院經歷李晟頗知車法卒為奸臣所擠奪官以去聞者惜之其人尚在乞賜召用仍懸金購募諳曉車戰之人以車制馬以馬制步而敵氣不奪敵技不窮臣不信也臣又聞敵矢雖強不能射遠我之所以制遠者莫如銃弩二械而銃一發多高下失中弩不傳藥犯者不斃臣督主簿高主通舍人范容以意創為鴛鴦銃一本兩莖貫二火鎗以藥信纏連次第延發初或少差次必奇中又制偏架弩一發兩矢傳以射虎毒藥

犯者立死此雖諸蠻所畏然施諸北邊亦足張威謹各
獻一具送兵部投進用彰燕石之愚倘蒙依式製造頒
諸邊鎮用以擊敵臣竊謂便臣僻處南徼於西邊事體
不能詳知但區區愛君憂國之心實懇惻不能自己芻
蕘之言固無足取而亦安敢以芹曝之獻見諂遠自沮
止耶若夫振紀綱以肅人心明賞罰以作士氣裁冗費
抑僥倖以優恤戰士此在皇上親賢遠佞斷而行之上
繼先帝之志圖功攸終豈疎遠愚昧微臣所敢與知耶

臣徧歷雲貴兩廣二十餘年瘴癘漸染積成痰嗽頭風
二疾療治未痊又以顛直敷陳大計屢忤地方用事大
臣終日冀臣有過從而擠之尚可與之共事耶臣伏覩
五月十八日詔書一欵欲將兵備等官裁革臣竇甘心
如蒙聖恩憐憫將臣放歸田里尋醫自便一二年間倘
前疾稍愈別請一職自効不與此敵俱生臣不勝戰慄
悚懼激切之至為此具本順差平樂府經歷顧瀟親齎
謹具奏聞

再上時務疏

廣西等處提刑按察司兵備副使臣張吉謹奏為陳言時務以祛邊患事本年二月十一日據平樂守禦千戶所申准平樂府故牒備奉兵部塲字壹千叁拾貳號勘合行取弩手及弩以備沿邊殺敵射用備申到臣欽此欽遵臣竊惟制敵之具惟弓與弩號為長兵自古謀勇將臣以弩張威克敵者誠為不少然臣深考其制正架之弩剗牀卧矢不可持滿以待必俟見敵蹶張乃可一

發一鏃不如偏架之弩頗用微蠟登搭絃筈坐作進退
持滿移時無乎不可逮其伺便發機二矢並注尤為勁
捷故臣嘗具一架命經歷顧濂送兵部投進冀頒沿邊
諸鎮以為制勝之助少攄一得之愚然其巧謬遲速係
於一機臣竊觀弩之有機猶人之有心自古君天下者
心正則事多合道天下可從而理矣苟心有未正事乖
乎道而欲收治平之效正猶射者不於其機而於其的
厥惟艱哉臣積久兵間偶知一械之微可喻人心之妙

獨抱野人芹曝之愚不敢自愛而僭陳之誠以陛下嗣
守祖宗洪業欲正天下以正四方亦不過先正其心以
為之本耳正心之要必先親近文儒留情經史備考古
今成敗得失以為鑒戒而又省事節慾以培之屏邪遠
佞以輔之使吾所存所發上可以當天心下可以慰人
望近可以養和平之福遠可以銷氛祲之萌則天下之
事烏有不可為者而四方何憂其不賓服哉此臣所以
惓惓自効之本心也使臣計不出此而徒詫一穢之長

謂其可以抗禦強敵何異孟津之人簪土以塞河流而不知為有識者之所竊笑耶臣以軍人陳紀善製偏架弩謹以所製十架並與其人仍送兵部驗用伏冀以一教十以十教百而沿邊諸鎮無不有製弩之匠無不善射之人安知他日不即獻功奏捷可以助天威於萬一耶然矢必傳藥犯者乃斃以藥言之惟本省那地州所產最善去臣治所尚遠又非該管地方殊為難得乞勅兵部行移兩廣總府大臣每歲量取該州善藥二三

金定口月
百瓶入貢京師頒給西方沿邊弩手射用當有資其利
者臣遠在萬里之外每虞邊患終日隱憂寢食俱廢蓋
臣子迫切之至情自不能已如此今據前因雖知事下
湖廣廣西兩省所貢必博所擇必精然恐彼以正架為
善而不知偏架之尤善彼進善射之人不如製弩之匠
可以沿造而無窮也為此具本順差軍匠陳紀親齎謹
具奏聞

乞恩養病再疏

廣西等處提刑按察司兵備副使臣張吉謹奏為乞恩
養病事臣以駑朽之資遭遇先帝明聖擢列外臺寵錫
璽書俾整飭府江及古田永福理定并西延咸水馬鞍
等處戎務臣受命以來夙夜兢惕恐辜任使於今七年
夫廣西之賊固為天下有名而臣所轄前項地方又為
廣西有名臣見弘治六年八年公私大苦江賊侵擾各
調數萬目兵窮追極討斬首雖多終不能得其要領欲
求旬日稍寧亦不可得臣嘗徧歷其地深求其故良以

山川險惡草木暢茂諸夷巢穴星散阻絕非人迹可到
故聚而為寇則倏忽成羣散而歸巢則深僻難見大抵
窮極變詐隱見出沒與鬼魅無異故上世目為鬼方非
特風氣所囿亦山川形勢助誘使然無足怪者此而與
角一旦之力殆與先年所為無異未見其可故臣數年
之間未嘗請調大兵邀功希賞以為民憂惟恪遵制勅
成言力求所以區處之術如擇據要害而併兵以守刻
定期日而整隊以行芟薶草樹以斥陰幽呼延向化以

通耳目長弓勁弩射疏及遠信賞必罰區別功罪又訪諸夷之中果有稔惡不悛者必百計去之而後已於是積年首賊如盤公蘓盤王郎唐公溫盤弩婆盤戰婆陸步行陸公堂李公禮王公票等皆次第授首而他賊始懼被害之人鮮矣前該巡按御史顏頤壽以府江賊報絕稀不信特置官簿發哨備錄公私過往按季送院查考終無可詰然一年之內尚有囚犯楊受聰等四人被擄雖經督追畢出而臣亦豈得辭其責哉况夷性貪婪

不得於此則求於彼計臣不該管轄地方固有被其害者多矣時或報到臣亦發兵截遏或黏踪以尾之或整陣以摧之或設伏以扼之或抵巢以殲之水陸二賊先後斬首通計七百一十餘功俱解總府軍門閱驗梟掛獲有批廻附卷訖今臣犬馬之齒五十有六舊苦痰嗽頭風二疾為患近年以來漸衰漸熾發作無時茲者三月初旬領兵出哨回至小結灘值水暴漲鉅浪摧壓臣舟泊溺久之賴軍士陳鳳等舍死拯救幸得復生因憶

往年放船檢校灘誤觸於石破沉不死今又值此厄不
數年間幾葬魚腹者再痛定思痛百念俱灰况濕氣所
蒸舊疾日苦增劇伏乞聖恩憐憫螻蟻微軀將臣放歸
田里俾得尋醫自便調理前疾倘或少延殘喘他日克
終天年牖下仰荷聖恩所賜多矣臣不勝懇切悚懼之
至為此具本順差軍匠陳紀親齎謹具奏聞

辨釋誣枉疏

貴州等處承宣布政使司左布政使臣張吉謹奏為辨

釋誣枉懇乞休致事臣犬馬之齒今年六十有二待罪湖廣按察使三閱月矣誤蒙聖恩拔擢陞臣今職臣雖至愚受恩深厚敢不感激圖報以死自誓但臣自少感患痰嗽病證治之數十年不愈然臣自覺五十以前血氣剛強精力壯健疾發之時操心調息服藥節食不久自愈近年以來覺得血氣精力日漸衰耗每遇疾發調攝愛養比舊加謹而咆哮喘急歲甚一歲臣素無長生久視之術衰疾如此豈能厚望延永哉故臣宜逸而不

宜勞宜退而不宜進宜治疾而不宜治民若苟背違必
賈殃咎但臣聞之人臣事君務直道不欺為本然所謂
欺者豈必蒙蔽罔上而自為身謀之謂耶易曰上交不
諂下交不瀆曰諂曰瀆皆欺也正德三年臣為山東右
布政使正德四年正月二十八日接到吏部照會文憑
一道除臣廣西左布政使將山東俸糧截日住支二月
闕日起程前赴廣西到任去訖時逆瑾用事差官查
盤山東錢糧而布政司以擅支修理曾廟銀兩奉承御

史胡節事迹敗露左布政使車璽無以自解歸罪於臣
坐削二秩降除兩浙運使臣奉命兢惕莫捫其蹤旣而
令人訪問乃車璽於三月初九日差人支取前銀旣而
事敗則以中傷於臣夫支銀之時臣接憑已四十一日
起程已三十五日豈復干與山東事耶幸賴皇上神聖
逆賊旣誅公道大明不數年間臣亦漸復故職臣曰夕
自揆惟德薄位尊力小任重是慮豈復有他念哉但思
舊為車璽所誣日月俱在蹤跡甚明况彼時奉有勘合

修理曾廟公移督促甚嚴臣分守本道不得已而區畫處置豈知後人以為奉承胡節之資耶夫奉承胡節亦不過為其經營免死而已與彼交通賄賂以戕民蠹政者固自殊科然臣思之不安於命而餽遺要路以紓其厄難是即上交而諂也不根於理而稔善下官以利其帑羨是即下交而瀆也既諂且瀆欺孰甚焉臣雖不材然賦性簡伉上下交承之分有不及而無過當胡節於臣既非鄉里親識又非年榜輩流何苦不知自重過為

是舉以獲罪於公論耶臣隳括平生所為泯忍可恥莫甚於斯此事不白臣死不瞑目如蒙皇上溥天覆之仁憫臣誣枉乞勅該部查臣陞遷去任日期於彼有無齟齬而一洗之憐臣老疾放回致仕俾得尋醫自便少延殘喘以終天年臣不勝感激恐懼隕越慚惶之至為此具本順差承差易秀親齎謹具奏聞

乞恩休致疏

貴州等處承宣布政使司左布政使臣張吉謹奏為乞

恩休致事臣自正德八年在湖廣拜領貴州新命隨即
抱疾而歸仰荷聖恩憐憫容令家居調養於今二年幸
而不死得以放浪山林竊觀太平之盛早晚起居無是
無非無榮無辱度德揣分自知受賜多矣然再疏乞休
未蒙俞允既而吏部題准移文原籍官司勘臣前疾有
無痊可此不忍遽以一疾棄之其待臣厚矣但官司所
據者里胥里胥所徵者鄰保是皆平日見臣少瘳而不
知臣之病根實未除也雖有勘結回申豈能盡得其實

耶臣之為疾舊疏敷陳已盡不敢贅以為言設使盡復無異平時而年踰六十筋力衰微精神耗憊不能驅馳國事明矣况臣疾勢雖退而餘殃發作無時藥餌雖捐而更僕抑搔尤甚所冀猷畎之中掛書牛角且耕且讀以終餘年於臣足矣尚敢首鼠兩端妄有希覲以騰笑於士大夫耶竊惟為人臣者忠貞之節固在自竭而進退之宜尤不可不審往年故翰林檢討新會陳獻章嘗語臣曰古之人難進而易退今之人易進而難退此古

今之人所以異也臣徧歷司府閱人頗多潛味其言真
不虛也倘蒙聖情垂念乞明詔許臣致仕使人咸知易
進難退之說未必盡然而古人今人亦未必不相及也
則臣身雖退而所得頗多事雖微而所關亦重臣不勝
感戴天恩之至為此具本順差從侄張景獻親齎謹具
奏聞伏候勅旨

古城集卷一

欽定四庫全書

古城集卷二

明 張吉 撰

陸學訂疑并序

朱陸之學先輩論之詳矣近世儒臣又謂其學始雖殊途終則同歸於一致備摘二家辭旨近似者類而證之是蓋又一說也然陸氏自謂使堯舜禹湯文武數聖人同堂而處其議論必有不合者然則象山復起而觀是

書不過拚口一盧胡耳吉少習朱氏諸經傳義漸漬既久而堯舜周孔之道坦然如在目前非異說所能遷惑矣如適國者之由通衢一啟耳目意會心慊而豈崎嶇榛莽以取捷疾者所能回其視聽耶竊惟學朱不得猶不失為博達之士學陸不得流為禪釋之歸必矣予惡夫世之從邪而畔正也乃取象山語錄反覆玩味有可疑者韻而訂之藏諸篋笥以俟知者擇焉若與其閑邪衛正不失為朱氏忠臣則世之偏執一隅詆訾先哲者

亦可以少愧矣正德己巳夏五月既望後學餘干張吉序

道理只是眼前道理雖見到聖人田地亦只是眼前道理

道在三才如地有水四海聖涯衆溝渠耳鉅細殊形烏有異旨先哲訓詞健誦無已

唐虞之際道在臯陶商周之際道在箕子天之生人必有能尸明道之責者臯陶箕子是也箕子所以佯

狂不死者正為欲傳其道既為武王陳洪範則居於
朝鮮不食周粟

唐虞商周道孰不由武陳厥謨武演厥疇武在臯箕孰
曰獨修稷契周召力贊皇猷道不領會何異庸流箕封
朝鮮匪自竄投不粟之說不經可尤

論語中多有無頭柄底說話如知及之仁不能守之
之類不知所及所守者何事如學而時習之不知時
習者何事非學有本領未易讀也苟學有本領則知

之所及者及此也仁之所守者守此也時習之習此也說者說此樂者樂此如高屋之上建瓴水矣學苟知本六經皆我註脚

先生曰本其本安在鄒孟有言先立其大道散在物伊則炳然種種異形執一難言曰忠而忠曰孝而孝不因君親何以自效專求諸內曰我得之脫竄禪流孰止塞之

天理人欲之言亦自不是至論若天是理人是欲則

是天人不同矣此其原蓋出於老氏樂記曰人生而靜天之性也感於物而動性之欲也物至知至而後好惡形焉不能反躬天理滅矣天理人欲之言蓋出於此樂記之言亦根於老氏且如專言靜是天性則動獨不是天性耶書云人心惟危道心惟微解者多指人心為人欲道心為天理此說非是心一也人安有二心自人而言則曰惟危自道而言則曰惟微罔念作狂克念作聖非危乎無聲無臭無形無體非微

乎因言莊子云眇乎小哉以屬諸人謦乎大哉獨遊
於天又曰天道之與人道也相遠矣是分別裂天人
而為二也

寂然不動乃性之靜感而遂通為情之正情失其正欲
乃熾盛禮言性靜未足為病動則為情謂性奚證記宗
易繫詞出元聖歸咎老聃徒亂瞻聽心雖無二知覺靡
定飲食男女道德性命體驗危微天淵昭映欲持其危
在克念敬子謂危者克念作聖滋惑後人奚從考訂

近來論學者言擴而充之須於四端上逐一充焉有此理孟子當來只是發出人有是四端以明人性之善不可自暴自棄苟此心之存則此理自明當惻隱處自惻隱當羞惡處自羞惡當辭遜處自辭遜是非在前自能辨之又云當寬裕溫柔自寬裕溫柔當發強剛毅自發強剛毅所謂溥博淵泉而時出之

擴充為說發自鄒人厥功甚碩貴驗諸身有士於茲忽見大賓揖遜威容雅雅循循煥然在目有識所珍謂禮

止此不笑即嗔百千經曲爛漫輪囷不俟人行曷自具
陳若曰心存統攝無垠不假餘力應物自神釋氏守心
堅確靡倫不忠不孝紀度隳堙得罪名教却又何因

夫子問子貢曰女與回也孰愈子貢曰賜也何敢望
回回也聞一以知十賜也聞一以知二此又是白著
了夫子氣力故夫子復語之曰弗如也時有姓吳者
在坐遽曰為是尚嫌少在先生因語坐間有志者曰
此說與天下士人語未必能通曉而吳君通敏如此

雖諸君有志然於此不能及也吳遜謝謂偶然

古今大患在篤自信賜不如回颺言不吝此何可及通敏奮迅重言煅煉以驅其進嫌少詆誣不異童齒首領稱嗟何無少靳

此道與溺於利欲之人言猶易與溺於意見之人言却難

釋老空無楊墨仁義努力前驅不復顧忌皆溺意見誠難與議先生論道每日簡易啟鑰抽闕非不切至概以

聖謨終岐而二片言自狀默樹赤幟

居象山多告學者云汝耳自聰目自明事父自能孝
事兄自能弟本無欠闕不必他求在乎自立而已

視不思明聽不思聰耳目之則壅闕不通愛敬怡然施
於親長雖根於心亦貴相强若都沒事曰本無虧湯武
聖人何假修為累德之基固在自立所立無差庶幾有
及

或問先生何不著書對曰六經註我我註六經韓退

之是倒做蓋欲因學文而學道歐公極似韓其聰明
皆過人然不合初頭俗了或問如何俗了曰符讀書
城南三上宰相書是已至二程方不俗然聰明却有
所不及

人之聰明相去絕異明此暗彼比比皆是韓歐所業種
學為文二程所得成性存存本末重輕難並收拾寶玉
棄珉何謂不及

或問先生之學當來自何處八曰不過切已自反改

過遷善

二程夫子造就人才必先格致涵養栽培孔氏家法久
鬱復開鼎鼎犧象闕壞壞傳播累葉統緒不頽逮乎
先生別出已見不貴研探力惇行踐切已自反改過遷
善崇德條綱敢不自勸懼乏真知久之必變若嚙梯屑
可當肴臠悅口澤膚孰不歆羨

吾與常人言無不感動與談學問者或至為仇舉世
人大抵就私意建立做事專以做得多者為先吾却

金
卷之二
卷二
欲殄其私而會於理此所以為仇

殄私會理其語甚大其理其私其旨安在不見孔釋水
炭相背其多私耶轍環不輟聖功烈烈其少理耶聲色
屏徹頑空子子斯理昭融充周八表鉅萬非多毫芒不
少明誠洞徹暉彩必彰本相既露亦難掩藏

今之論學者只務添人底自家只是減他底此所以
不同

學惡孤單孤單無親亦惡駁雜駁雜不純道有因革事

有屈伸活人手段推陳致新增減既異孰偽孰真增所
當增肺腑生春損所宜損瘠餒不貧調瑟膠柱伐道揮
斤若有捷徑可造聖人伊周孔孟胡不指陳

先生問學者云夫子自言我學不厭及子貢言多學
而識之又却以為非何也因自代對云夫子只言我
學不厭若子貢言多學而識之便是蔽說

多材多藝公旦攸稱裒多益寡易象所登說曰多聞孔
曰多能於稽多義厯厯可憑先生所貴直截冥斤推挹

繁簡累有辭徵至是病賜尤闕不宏多學而識浚自師承以開其端以發其藹歸咎於賜殊乏準繩賜咎安在一唯不曾是非易處塹谷頽陵

可與適道未可與立可與立未可與權唐棣之華偏其反而豈不爾思室是遠而子曰未之思也夫何遠之有上面是說階級不同夫子因舉詩中室是遠而之語因以掃上面階級蓋雖有階級未有遠而不可進者也

契勘哲人格言篤論血脉條貫聯屬寸苟於其間牽
引藤蔓左衽右鑿終不相異是章析之詞義俱暢合之
不類適增疑障宛轉附會巧隣哲匠細味詳研終為冗
長

繫辭首篇三句可疑蓋近於推測之辭

吾之深信者書然易繫言默而成之不言而信存乎
德行此等處深可信

六籍恢恢輿輦斯道聖筆刪修古今共寶說事說天易

書皞皞缺文疑義容或懊惱敢布然疑區分醜好首繫
淵微渾然天造謂近推測殊顛白阜典貢盤誥精思力
討屢降屢殊居然可考盡信無疑恐終潦草易可信者
若止三言昭昭衆訓豈盡為謾神徂聖伏蛙黷宵喧

自周衰以來人主之職分不明堯典命羲和敬授人
時是為政首後世乃付之星官厯翁蓋緣人主職分
不明所致孟子曰民為貴社稷次之君為輕此却知
人主職分

昔在鴻荒民風簡約茹毛飲血巢栖穴托犧皞炎黃應
時迭作卦爻書契以陳以拓耒耜舟車室廬棺槨利用
周完既康且樂獨于占候法猶濶略帝不垂情民時奚
莫舜命九官已默欽若豈隳厥職事異今昨君職何居
弼亮是度不得則憂得之乃樂憂樂在人胡不寬廓孟
氏斯言對疾良藥目為君職恐失之鑿

詩大雅多是言道小雅多是言事大雅雖是言小事
亦主於道小雅雖是言大事亦主於事此所以為大

雅小雅之辨

道寓於器器載乎道剖析以言終為潦草四牡鹿鳴唐
棣天保反覆吟哦芬腴盈抱公劉后稷板蕩杲杲即顯
知微悔讀不早季札所次載稽載考淺深低昂如析鮮
槁晦蝕埃氛誰加汎埽

諸公上殿多好說格物且如人主在上便可就他身
上理會何必別言格物

所議奏對固泯無間主身與物似不可分明目達聽天

叙人文為暴則滅為德則君所格不越所陳不羣觸類而長匪身曷云知人則哲作室楣芬大學首義敢棄不
論

先生在勅局日或問曰先生如見用以何藥方醫國
先生曰吾有四物湯亦謂之四君子湯或問如何曰
任賢使能賞功罰罪

醫國醫人必審疾勢勢則不審藥之必厲裏遁筆誅仇
復九世魯莊見貶視仇泄泄語宋多難聞者揮涕荼毒

金史卷之二
衣冠劫遷二帝神州赤子禽獮草薶宗社為墟播越海
澨忍恥偷安不思大計浮沉累代一切蒙蔽九法三綱
掃地陵替苟以復讐感激自誓血誠上達事當允濟簡
任賢能福威明晞俞張開闔作我凡例勿樂之喜不假
占筮

先生云後世言道理者終是粘牙嚼舌吾之言道坦
然明白全無粘牙嚼舌處此所以易知易行或問先
生如此談道恐人將意見來會不及釋子談禪使人

無所措其意見先生云吾雖如此談道然凡有虛見
虛說皆來這裏使不得所謂德行常易以知險常簡
以知阻也今之談禪者雖為艱難之說其實反可寄
託其意見吾於百衆人前開口見膽

不伐不矜望道未見神禹聖文萬古歆羨宣尼自視歔
然不勝不曰豈敢則曰未能烏有後人侈然自大信已
既篤殆且無奈開口見膽自詫非禪不知失脚墮落井
天彥國鋪陳晦叔簡當君實優游伯淳條暢如子所詆

悉匪好辭號於百衆誰則信之

先生云凡物必有本末且如就樹木觀之則其根本必差大吾之教人大概使其本常重不為末所累然今世論學者卻不說此

棄本逐末舉世滔滔一遇智人錙銖莫逃屏絕百計惟心是操釋氏本相西域稱豪聖門事業獨異此曹表裏一致不遺纖毫日月匪明泰華匪高運參天地簡易無勞回視他術輕眇一毛

劉淳叟叅禪其友周姓者問之曰淳叟何故捨吾儒之道而叅禪淳叟答曰譬之於手釋者是把鋤頭儒者把斧頭所把雖不同然却皆是這手我而今只要就他明此手友答云若如淳叟所言我只就把斧頭處明此手不願就他把鋤頭處明此手先生云淳叟亦善喻周亦可謂善對

懷玉待沽手吾之手不壞金剛鋤視厥肘形骸外物於我何有不操吾斧奮力擊剖設辭依阿迭有勝負善喻

善對胡取二叟

先生居象山多告學者云汝耳自聰目自明事父自能孝事兄自能弟本無少缺不必他求在乎自立而已學者於此亦多興起有立議論者先生云此是虛說或云此是時文之見學者遂云孟子闢楊墨韓子闢佛老陸先生闢時文先生云此說也好然闢楊墨佛老者猶有此氣質吾却只闢得時文因一笑

耳目聰明寶維天則聾瞶滿前伊誰之責孝弟根心

世多凶德弗究弗圖並隳厥職雖無欠缺學敢不力不
學求立其仆必亟楊墨佛老惡紫亂朱其色不紫何
事驅除居今之世由今之途應舉取第能不文乎躋險
捐階則近於愚闢所當闢拊卷嗟吁

惟溫故而後能知新惟敦厚而後能崇禮

人非溫故固莫知新故而不新奚取陳陳自非敦厚亦
莫崇禮厚而無禮亦何足齒知行兼舉內外交修不遠
之復庶為我收

有士人上詩云手挾浮翳開東明先生頗取其語因云吾與學者言真所謂取日虞淵洗光咸池

聖言近遠如地如天觀其所處猶自退然餘者立說安保無偏厚自夸詡甚無謂焉執此明道彌爵不宣胡為自况取日虞淵

冉子退朝子曰何晏也對曰有政子曰其事也魯國無政所行者亦其事而已政者正也

政出於國事行於家園冠句屨截爾無差求所退者季

氏私衙謂魯無政獨未思耶所對忍使驛駕同秣聖訓
片言潛施抑奪陽舒陰慘生意潑潑萬世之下想見顛
末涸轍猶歡枯稊尚活此而未省去道遠濶柴陽微辭
端倪軒豁彼疏斯輝孰可闕抹

陽一君而二民君子之道也陰二君而一民小人之
道也陽奇陰偶陽以奇為君一也陰以偶為君二也
易繫深奧未易研詳粲然明朗不有是章震坎與艮卦
體皆陽與離屬陰兌亦相當陽奇陰偶牝牡驪黃奇則

為君上體乾剛偶為民象柔比坤鄉君寡民衆得道必
昌民寡君衆失道必亡六子既列奇偶既張其寡其衆
不假數揚以偶為君象數俱荒說輕未瑩終類粃糠

元晦似伊川欽夫似明道伊川蔽固深明道却通疏
軻沒學絕長夜漫漫天憫斯人冥趨瞽竄篤生二程旭
日始旦上接墜緒扶搖霄漢姬孔情文淵思條貫錫謚
不虛萬代偉觀伯子之純固不待贊渾渾元氣誕無畔
岸叔子之正同本異幹寒水凍雪凜不可玩夷齊可作

必興羨嘆謬摘瑕疵顛覆公案他人為此乃無忌憚奈何先生亦欠詳緩

天下之言性也則故而已矣此段人多不明首尾文義中間所惡於智者至智亦大矣文義亦自明不失孟子本旨據某所見當以莊子去故與智解之觀莊子中有此故字則知古人言語文字必常有此字易雜卦中隨無故也即是此故字當孟子時天下無能知其性者其言性者大抵據陳迹言之實非知性之

本往往以利害推說耳是反以利為本也夫子贊易
治厯明時在革之象蓋厯本測候常須改法觀革之
義則千歲之日至無可坐致之理明矣孟子言千歲
之日至可坐而致也正是言不可坐而致以此明不
可求其故也

談性何居惟故與利故則有微利為之地不見神禹利
導百川縱橫捭闔一出自然故如厯家先考躔度星遠
天高豈逃乎數是章兩段申解甚明自子引據大易莊

生字義隱晦讀者始驚已逝陳迹孰匪故情故而可去
古訓須更明目張膽敢昧權衡

所謂誠其意者毋自欺也一段是總修身齊家治國
平天下之要故反覆言之如惡惡臭如好好色乃是
性所好惡非出於勉強也自欺是欺其心慎獨即不
自欺誠者自誠而道自道也自欺不可謂無人知十
目所視十手所指其嚴如此

大學是章專釋誠意自慊者充自欺者蔽充則必誠蔽

則必偽始終發越莫非二義舍慊言欺何所底至雖修厥德不足潤身終愧自慊豈曰成人修齊治平固有其要執一以言能無遺漏

惟器與名不可以假人只當說繁縷非諸侯所當用不可以與此人左氏也說差卻名了是非孔子之言如孟子謂聞誅一夫紂矣乃是正名孔子謂蒯賁輒之事乃是正名至於溫公謂名者何諸侯卿大夫是也則失之矣

惟器與名似二非二區別太過反害於義蓋古謂名潛
寓於器大夫歌雍諸侯請隧峻拒嚴誅賴彼聖智大防
苟在名未墜地國脉奄奄猶有屬繫繁纓雖小雍隧何
殊奈何不恤陰長禍樞聖慮淵深圖難於易逆之則亂
循之則治謂此非名終啟異議

或謂先生之學是道德性命形而上者晦翁之學是
名物度數形而下者學者當兼二先生之學先生云
足下如此說晦翁晦翁未服晦翁之學自謂一貫但

其見道不明終不足以一貫耳吾嘗與晦翁書云揣
量模寫之工依倣假借之似其條畫足以自信其節
目足以自安此言切中晦翁之膏肓

道之大原本出於天散在萬物形色自然流行古今滔
滔百川播諸六籍因言以宣士志於茲力貴精專駁雜
泛濫多岐所牽空寂孤單不覩大全獨有一法孔鑄子
淵博文約禮並造兼權未入聖域惜無長年鄒孟而下
絕學不傳競取魚兔不操蹄筌終日無獲奚足怪焉卓

哉晦翁亞聖大賢孔顏法度宛在目前公惡異已騰口
翩翩彼所得者略不推先昧耶私耶孰任厥愆

松又曰智聖雖無優劣却有先後畢竟致知在先力
行在後故曰始終先生曰是

先後次第學者梯階天運乾知惟聖與齊豈有程度往
來於懷始終終始更迭相諧區分既謬旨趣頓乖其知
生知不假思齊其行安行豈俟安排管窺蠡測天海一
涯蕩蕩無垠見與孰偕

中心斯須和不樂而鄙詐之心入之外貌斯須不
莊不敬而易慢之心入之與告子不動心是操持堅
執做孟子不動心是明道之力

和樂莊敬養心大方顯微一致表裏兼防希賢門戶入
聖梯航其視告子屏絕商量塊守一心自獨俾臧霄壤
懸隔亦孔之彰擠為一類於義奚當孟不動心資兼勇
智自述所長知言養氣明道之力先生所譽却以知言
為心後事又舍養氣不以為言胡逝其梁不入其門九

泉可作能無異論

松嘗問梭山云有問松孟子說諸侯以王道是行王道以尊周室行王道以得天位當如何對梭山云得天位松曰却如何解後世疑孟子教諸侯篡奪之罪梭山云民為貴社稷次之君為輕先生再三稱歎曰家兄平日無此議論良久曰曠古以來無此議論松曰伯夷不見此理先生亦云松又云武王見得此理先生曰伏羲以來皆見此理

文王作則保民周矣豈有他圖為商仇矣孟談王道亦
茲儔矣心在元元寧無憂矣匪勸齊梁為邪謀矣輕重
之分何不侔矣再三歎賞不深求矣奸雄借口沛橫流
矣我則憂之曷其瘳矣

舜隱惡而揚善說者曰隱藏也此說非是隱伏也伏
絕其惡而善自揚耳在己在人一也為國家者見惡
如農夫之務去草焉芟夷蘊崇之絕其本根勿使能
殖則善者信矣故君子以遏惡揚善順天休命也

謹按是章意在用中不問不察傷明與聰不事揜覆疵
類靡容不樂揄揚玉偶賤工曷施權度以振皇風先生
取譬除草去本斷則有餘遇決必損矧施諸此尤未深
忖

人之其所親愛而辟焉之其所賤惡而辟焉之其所
畏敬而辟焉之其所哀矜而辟焉之其所敖惰而辟
焉辟比量也家中以次之人以我親愛賤惡而比量
之或效之或議之其弊無窮不可悉究要其終實不

足以及齊其家

親愛賤惡畏敬哀矜情所必有理所必登若畏比量將何所懲必與槁木死灰為朋釋氏捐家猶病罕承風自火出奈愧彼僧亂家之政恐因是增

徐仲誠請教使思孟子萬物皆備於我矣反身而誠樂莫大焉一章仲誠處槐堂一月一日問之云仲誠思得孟子如何仲誠答曰如鏡中觀花答云見得仲誠也是如此顧左右曰仲誠真善自述者因說與云

此事不在他求只在仲誠身上既又微笑而言曰已是分明說了也少間仲誠因問中庸以何為要語答曰我與汝說內汝只管說外良久曰句句是要語梭山曰博學之審問之慎思之明辨之篤行之此是要語答曰未知博學學個什麼審問個什麼明辨個什麼篤行個什麼

子藥仲誠欲先反觀根柢欲固基址欲完名近務本實亦未安心齋坐忘獨回不難曾閔猶未矧後儒酸奚怪

仲誠輒語更端學問思辨篤行之說梭山所陳要旨截
截未契子心終被反詰子壽仲誠若能早悟擊節稱嗟
不在平素

臨川一學者初見問曰每日如何觀書學者曰守規
矩歡然問曰如何守規矩學者曰伊川易傳胡氏春
秋上蔡論語范氏唐鑑忽呵之曰陋說良久復問曰
何者為規又頃問曰何者為矩學者但唯唯次日復
來方對學者誦乾知大始坤作成物乾以易知坤以

簡能一章畢乃言曰乾文言云大哉乾元坤文言云至哉坤元聖人贊易却只是個簡易字道了遍目學者曰又却不是道難知也又曰道在邇而求諸遠事在易而求諸難顧學者曰這方喚作規矩公昨日來道甚規矩

易簡至德聖神能事賢如淵騫猶假積肆後生小子踵門委質意趣未見綸緒未比驟而語之聖神地位茫然莫措顧增疑慮古人設教循矩蹈規有禮有樂有書有

詩以育其德以解其疑童而習之長而成之陟遐自邇
升高自卑日積月化成德比比於稽虞周孔孟施為孰
有越此別樹旌麾下逮竺僧流入中國直指心性謂超
聖域滔滔千古誑誘迷惑得罪名教童齷所識嗚呼先
生暗投其隙嗚呼吾人謹修其慝

歷家所謂朔虛氣盈者蓋以三十日為準朔虛者自
前合朔至後合朔不滿三十日其不滿之分曰朔虛
氣盈者一節一氣共三十日有餘分為中分中即氣

也

氣盈朔虛以期為斷理可推知度易考算以月為準先生公案離合乍分躔度始判精察雖知約求易亂月之有日三十其恒於稽節氣其數必增於稽晦朔數必不登逮夫一年粲然易見增減五日如合契券盈虛之辨耿于沃燈古訓具在吾意所仍

士不可以不弘毅譬如一個擔子盡力擔去前面不奈何却佳無怪今自不近前却說擔不起豈有此理

故曰力不足者中道而廢今女畫

弘毅為言主賓對待匪弘不容匪毅不耐不見小車無以任大不見敝車載輸爾載廢一則偏於道奚望子獨言毅不言弘狀設可小成終鮮通暢曾氏遺言中心想像

學者不長進只是好已勝出一言做一事便道全是豈有此理古人惟貴知過則改見善則遷今各自執已是被人點破便愕然所以不如古人

子於晦翁高喝大罵辭色之間不少假借若曰明道事
尤可訝俯仰低昂判如旦夜靡聖管管孰定其價堅執
已是欲人莫疑數尺童子恐亦難欺今觀是言最為切
實胡乃律人不以自律

須是信得及乃可

知之必真信之必篤信而不知燕石良玉蕭衍事佛豈
信不酷國破身亡古今大辱不知而信自貽鴆毒

道在天下加之不可損之不可取之不可捨之不可

要人自理會

斯道坦坦平鋪面前幽厲不由道何與焉本無加損本無取舍如曰不可終未脫洒

皇極之君斂時五福錫厥庶民福如何錫得只是此理充塞乎宇宙

建極惟皇四海嘉靖民情不擾民性自定壽福康寧好德終命如川之至如苗之盛不濬而通不扶而徑豈必手授方為錫慶斯理充周其論固正但以說經未免有

病

韓退之言軻死不得其傳固不敢誣後世無賢者然直是至伊洛諸公得千載不傳之學但草創未為光明到今日若不大段光明更幹當甚事

絕學草創乃在濂溪逮夫二程顏孟肩齊千古墜緒兩手提攜千古迷途指示東西俊偉光明孰過乎此子所寘司禪門宗旨沒他蹊莫知所止却曰二程未光明耳安知後人乃以病子

某平日未嘗為流俗所攻攻者却是讀語錄精義者
程士南最攻道學人或語之以某程云道學如陸某
無可攻者又如學中諸公義均骨肉蓋某初無勝心
日用常行自有使他一個敬信處

孔道至大天下莫容絕糧陳蔡匡人見攻伐樹削迹宋
衛俱窮功高堯舜猶遭閔凶何況後儒可休厥躬人心
如面種種不同苟非鄉愿孰必我從矧彼羣小多私少
公不德嫉德無功忌功囂囂讒口曷病晦翁子之學術

逃讒固工惜所乏者謙退之風

問作文法先生云讀漢史韓柳歐蘇尹師魯李淇水
文不誤後生

問伯敏云作文如何伯敏云近日讀得原道等書猶
未成誦但茫然無入處先生云左傳深於韓柳未易
入且讀蘇文可也

六經包括天地古今道體粲然秋空太陰其氣渾厚其
詞雄深萬世所寶合璧兼金韓歐諸子近代所欽各奏

其說下上浮沉亦以根據六籍為心長公之文天材逸出大江洪河諸篇一律苟乏其材欲窺其室何異夸父虞淵逐日況其出入佛老百家學步效顰能保無差先生素業惇本是嘉及觀是訓能不惑耶

伯敏云如何是盡心性材心情如何分別先生云如吾友此言又是枝葉雖然此非吾友之過蓋舉世之弊今之學者讀書只是解字更不求血脈且如情性心材都只是一般物事言偶不同耳

我觀聖賢迭作輝映前乎堯舜後乎孔孟所論心學明
備中正心體孔圓虛中而應四德畢具其名為性感動
乃情昭昭可証其仁不忍其義不為擴充發越廣大無
涯不目曰材其孰以之孟氏既沒此學陵夷醇如仲舒
未免支離曰性質樸曰情私欲懸疣負贅吾體奚屬自
餘諸子說尤未精如惡如混三品之稱各出意見自為
機軸正學榛蕪久之不復直逮有宋真儒挺生周啟其
鑰詳於張程紫陽晚出集厥大成錙銖秒忽必入權衡

寥寥絕學至是重明性材心情如何分別伯敏所問非
為不切不意先生反施抑折若謂四者不必分區耳目
口鼻可通名歟

見道後須見得前時小陋君子所貴乎道者三說得
道字好動容貌出辭氣正顏色其道如此須是暴慢
自遠鄙倍自遠

容貌辭氣稟於有生狂迷不減聖哲無增暴鄙之風了
不我卽誠意交孚不假矯飾斯乃盡善道固彰彰一有

未至即匪周行若於動作正出之間是非善惡弗究其
端遽自為道却恐未安人具是形必有天則匪則是由
動致顛踣幸而不敗亦必無成豈可濫竿斯道美名
予舉荀子解蔽遠為蔽近為蔽輕為蔽重為蔽之類
說好先生曰是好只是他無主人有主人時近亦不
蔽遠亦不蔽輕重皆然

主敬窮理療蔽良藥羣哲攸傳詳於伊洛欲開聰明在
力專確鬼神依歸水鑑照灼遠近重輕隨手脫落渙然

冰釋融為至樂若不理會物理事情曰有主人不假他
營似敬非敬似誠非誠所守益堅所失益宏畢竟共軟
禪釋宗盟毫釐千里所係匪輕

吾有知乎哉晦庵言謙辭又來這裏做個道理

無而為有憚夫洋洋視有如無君子謙光聖心廣大日
月並明却曰無知匪謙奚當惡增樂損先生之常此而
可損義則弗彰

不愛教小人以藝常教君子以藝蓋君子得之不以

為驕不得不以為歎小人得以為吝敗常亂教

先生曰藝不審謂何若曰六藝固列童科若曰九流役心則訛小人挾藝足以餬口敗常亂教豈出其手是在吾人宜知自咎

古之君子知固貴於博然知盡天下事只是此理所以博覽者但是貴精熟知與不知元無加損於此理若以不知為慊便是鄙陋以不知為慊則以知為泰今日之慊乃他日之泰

庀工鳩材志在作屋縑絲振采期製爾服博洽多聞徒
資耳目若遇至人能無慚惡學不知要奚事精熟約必
反求德必深蓄孔易軻篇開緘啟匱翊戴以行遠到可

卜

理只在眼前只是被人自蔽了因一向悞証他日逐
只是教他做工夫云不得只如此見在無事須是事
事物物不放過磨攷其理且天下事事物物只有一
理無有二理須要到其至一處

水必歸海星必麗天萬里森著烏有二原釋氏守空欲
照無邊如奩一鑑坐了姪妍咸知不可豈在明賢博而
精之靜以俟焉融會貫通終歸渾然斯乃至一昭映天
淵二程朱子數以為言豈其獨見古聖流傳先生此論
脗合無偏開示後學規矩方圓吾人敢不奉以周旋
問子路死之非只合責當時不合事輒曰此是去冊
子上看得來底亂道之書成屋今都滯在其間後云
子路死是甚次第

經於崩贖書衛世子不斥絕之固有深旨為輒計者理
宜何以贖未歸戚攝位以俟贖既入戚請君衛氏贖力
引咎遜輒不履輒乃嗣立情非得已庶蓋前愆亨屯傾
否子路仕衛固昧進止大計復乖國議蔑此後雖執義
結纓而死徒善其終不善其始冊子陳迹有非有是不
與考訂奚分惡美成屋諸書固多異指權度在我寧無
可紀概目亂道未之思耳

初教董元息自立收拾精神不得閒說話漸漸好後

被教授教解論語却反壞了

收拾精神固為學本若匪切磋懼終不穩行必空疎言
必邪遁見諸事為不困即蹇論語一書言近指遠譬切
於人穿衣喫飯不學牆面後悔恐晚講授容疏寧致壞
損元息漸好勉修婉婉脚跟未定安保不反歸咎授書
恐未深忖

我無事時只似一箇全無知無能底人及事至方出
來又却似箇無所不知無所不能之人

人之有心廣大無垠克充其量斯乃大人方其未發體
靜以真沛而為用浩無涯津明參天地幽贊鬼神聖以
是聖仁以是仁履謙戒滿執肯自陳施姿婀娜衆目所
珍倘伐厥美見者必嗔

嘗作高祖無可無不可論誤解了書謂人心人偽也
道心天理也非是人心只是說大凡人之心惟微是
精微纔粗便不精微謂人欲天理非是人亦有善有
惡天亦有善有惡豈可以善皆歸之天惡皆歸之人

典謨精義莫過是章三聖授受帝道大綱體驗諸身滋味孔長皮膚摸索終隱弗彰心之為用本異其方飢欲得食寒欲增裳是曰人心亦匪不臧為臣思忠為子思孝道心自然不待詔教危則易陷微則難較一察秋毫一執勅約念之惕然千古猶效善惡之分畔經傷巧可聞其聲不覩其貌

與小後生說話雖極高極微無不聽得與一輩老成說便不然以此見道無巧只是那心不平底人揣度

便失了

聖門設科以待學者軒輊低昂因人高下如器在陶如金在冶各成其形隨宜用舍若有豪傑深造允升前俯後仰亦因其能公執一說以概不平後生聽受寧無變更老成柄鑿固亦難憑苟反諸已或益得朋專持我是殊覺不宏

數即理也人不明理如何明數

意言象數以理為宗謂數即理似太渾融必據其理以

求其數不雜藝術方免差誤

人而不為周南召南其猶正牆面而立也學者第一義古之欲明明德於天下者此是第二孔子志學便是志此然須要有八處周南召南便是八處

自古論書無如大學階布條分既明且約士子權輿君師矩矱天下明德學之極功自何而入物我交融二南叙述風化之首修齊明驗燦如星斗目為八處却難下手二者兼收盛美無儔曠古再見有虞成周

漢書食貨志後生可先讀又着讀周官考工記又云
後生好看繫辭皆贊嘆聖人作易

食貨辨覈考工精嚴易繫如仙超然不凡後生為學固
有次第讀書先此懼非首義

學者不可翻然即改是私意是不長進

勇於改過孔門所嘉賢如子路孰不稱嗟聞風而起進
德無涯翻然即改子路流亞病其為私終可疑訝恐彼
頑懦因風長價

某觀人不在言行上不在功過上直截是雕出心肝
孔孟觀人各有法度尺寸無差分毫不誤其語渾然含
蓄不露縱有後人雕出肝肺力議晦翁已為失據自餘
得失何足深計

某平生有一節過人他人要會某不會他人要做某
不做

當會而會會之為貴當做而做其做不過惟理是視吾
何容心乃無滯泥君子所欽

又云孔門弟子如子夏子游宰我子貢雖不遇聖人亦足號名學者為萬世師然卒得聖人之傳者紫之愚參之魯

由喜聞過百世之師先哲定論確然無疑游夏四子子路等夷若師萬世先聖何為聖道所屬獨在子淵天不慙遺早歲天闕賴有子輿晚得其傳子羔行義固已卓然過譽傳道曾氏齊肩前此未聞乃一家言

先生舉公都子問鈞是人也一章云人有五官官有

其職某因思是便收此心然惟有照物而已他日侍坐無所問先生謂曰學者能常閉目亦佳某因此無事則安坐瞑目用力操存夜以繼日如此者半月一日下樓忽覺此心已復澄瑩中立竊異者遂見先生先生目逆而視之曰此理已顯也某問先生何以知之曰占之眸子而已因謂某道果在邇乎某曰然昔者嘗以南軒張先生所類洙泗言仁書考察之終不知仁今始解矣

子南登樓不踰半月已令眸子瞭然不汨假以歲年丰
神所發當如聖先夜光勃勃莊列伎倆土苴緒餘辛勤
收拾見子南且持此適道背馳非歟不施鍼砭病痛曷
除

先生曰讀書不必窮索平易讀之識其可識者久將
自明毋耻不知子亦見今之讀談經者乎歷叙數十
家之旨而以已見終之開闢反覆自謂究竟精微然
試探其實固未之得也則何益哉

熟讀精思優游涵泳讀書良法亦惟主敬若但平易不
必窮探義理精微何日沉酣漢儒穿鑿唐儒瑣碎說經
病經固莫逃罪程朱晚出折衷羣言下垂軌範上溯淵
源試探其實誕無涯涘但恐殊途自生異議

洪範有猷是知道者有為是力行者有守是守而不
去者曰予攸好德是大有感發者

衆人所長不能無異或有謀略或饒幹濟或自矜持恬
於勢利隨器甄收固可用世罔知好德何所底至建極

金史口月令卷二
惟皇慮厥流弊俾羞其行不職一藝欲昌乃邦道甚直
遂若以三者咸歸道義復使之羞却為疣贅

湯放桀武王伐紂丘民為貴社稷次之君為輕之義
孔子作春秋之言亦如此

湯武放伐事非得已順天應人歷數歸止春秋大義明
如皎曦尊王賤霸內夏外夷雖其行事假權南面力主
宗周何嘗少變迹異湯武居然可見君民輕重有為而
言申解甚明不俟引援先生對客累稱其說亂賊流聞

恐致心熱三綱攸繫敢廢辨折

誠則明明則誠此非有次第也其理自如此可欲之
謂善知至而意誠亦同

誠明明誠性教分歧雖無次第却有等差善信美大至
於聖神大學條目有脊有倫次第懸殊如廉如陞概而
言之似乖本義

天理人欲之私論極有病自禮記有此言而後人襲
之記曰人生而靜天之性也感於物而動性之欲也

若是則動亦是靜亦是豈有天理物欲之分若不是則靜亦不是豈有動靜之間哉

子在洞中深辨義利學者感激至於垂涕理欲區分於是為至發自聖門綽有端緒胡輒忘之歸咎戴記方其靜時泯然無迹烏有是非容窺罅隙動則可尋是非曲直子謂是者其存主乎動靜之間煞有工夫不加檢點必入他途

古城集卷二